

Date – 07/08/2025

Time - 7:30 -7:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Mizoram chak lakluhna kawngpui NH 306&06 kawng dunga lirthei tangkhang driver te hnenah sorkar hmalakna innimin tlai khan ei tur leh tui thianglim pek an ni leh.
2. Lirthei a Eizawng Pawl Hrang Hrang ten kawngchhe siam chuan an beisei a phak loh thu leh zankhat thil thuah rah chhiat leh vek hlauhthawnawm an tih thu an sawi.
3. Hmarchhakah rel kawng km 278 a thui siam a ni tawh.
4. US in an rama India bungraw thawnlukah chhiah a ti sang chu India in a dem thu a sawi..

<><><>

ADVISER TO CM

Mizoram chak lakluhna kawngpui NH 306&06 kawng dunga lirthei tangkhang driver te hnenah sorkar hmalakna innimin tlai khan ei tur leh tui thianglim pek an ni leh a.

Ei leh in tur sem hna hi District officialte bakah Kolasib atanga hmar lamah chuan KDTOA & MTDA leh an phungbawmte an kalpui a, chhim lam chu Kolasib Sub-Hqrs. YMA ten an kalpui bawk a ni. Lirthei khalhtute hnena eitir semchhuah te hi buhfai, Alu, dal, tel, purunsen leh tui thianglim te an ni.

Sorkar thuchhuah tarlan danin, NH306&06 kawng chhe thawmthat hna thawh mek anih avang hian kawngpui dungah lirthei thahnem tak a tangkhang a. Lirthei tam zawk dinna hmun te hi Rengtetlangsang, Bilkhawtlir, Bualpui , Kawnpui leh Khamrang bulah te an ni.

Hetihlai hian Advisor to CM (Finance) Pu TBC Lalvenchhunga'n Mizoram chak lakluhna kawng chhia chu siam mek a ni a, Lirthei Ke 14/16 tih loh chu lirthei tang an awm mumal lova, harsatna lian tak a awm tawh lo an beisei tih a sawi.

Akashvani Aizawl zawhna chhangin, MLA Pu TBC Lalvenchhunga chuan kawngchhe chungchangah ZPM chuan mawhphurhna la in, siamthat a nih theih nan theihtawp a chhuah mek a, kumdangah chuan hetiang hi a thlen tawh loh an beisei a ti a. Kawngchhiat chhan chu mawhphurhna inchuh vang a ni tih mipuiten an hre tlang vek tawh a ti.

Kawngchhia chu sorkar enkawl ni tawh lo mahse theihtawpin hma a la a, Chief Minister Pu Lalduhoma pawhin a siamthat theih nan sum a sanction a, PWD Minister hovin a department chuan a hmunah an riahchilh a, siam tha turin theihtawp an chhuah mek a ti a. Lirthei Ke 14/16 tih loh chu lirthei tang an awm mumal lova, harsatna lian tak a awm tawh lo an beisei tih a sawi.

Pu TBC a chuan lirtheia eizawngten sorkar an thawhpui tha a, kawng siam a nih theih nan lirthei tlan loh an remti chu lawmawm a tih thu a sawi a, lirthei tlan chawlh chhung hian kawng chu tha taka siam hman a nih a beisei tih a sawi.

Zawhna chhangin Pu TBC-a chuan thal laiin kawng siam lo tawp an ni lo a, kumin January thla ah NHIDCL enkawl tura tih ni mah se kawng an siam nghal loh avangin Mizoram sorkar chuan theihtawpin a thawm tha a, tuna lirthei tanna lai ber Mega Footpark phei chu an metal vek a, duhthu a sam lo deuh a, Fur a lo thlenin bungraw rit tak tak phur lirthei lo lut te chu kawng chuan a dawl zo lo a ni a ti a, tunah cheng vbc 50 in an sub-contract a engemawchen chu an siamthat theih tawh a beisei tih a sawi.

<><><>

COMMERCIAL VEHICLES

Lirthei a Eizawng Pawl Hrang Hrang te Joint Committee-in Vairengte leh Aizawl inkar kawngchhia thawm that hna thawh mek chu nimin khan an endik a, an beisei a phak loh thu leh zankhat thil thuah rah chhiat leh vek hlauhthawnawm an tih thu an sawi.

Lirtheia Eizawng Pawl Chief Convener Pu Robert Lalrinawma chuan Akashvani Aizawl zawhna chhangin, Lirthei a Eizawng Pawl Hrang Hrang Joint Committee atangin Earth Movers Union, ZDU, MTOA, MTA, Mizoram Commercial Tippers Association, Fak Hlawh lo Valrual, 407 Association leh Tanker Association tiamin pawl hrang hrang an kal tih a sawi a, kawng siam mek chuan an beisei a pha lo a, hetihrual hian fur lai a nih avangin tih vak ngaihna a awm lo a ti a, tun dinhmunah sorkar in lirthei chhuah tir ta se, tuna kawng an siam ho pawh zankhat thil thuah an rap chhe leh vek ang tih a hlauhthawnawm a ti. A bikin Khamrang a Mega Food Park te chu dinhmun derthawng zual an ni a ti a, lirthei ke 14 chin chunglam tlan phal loh an nih avangin an ding rih vek a, heng ho hi an tlan chhuah tir chuan kawng siam mek chuan zankhat a daih an rin loh thu sawiin, beidawnthlak an tih thu a sawi a ni.

Pu Robert Lalrinawma chuan Mizoram sorkar thuchhuahah chuan August ni 7 thleng kawngpui siam a ni ang a, ni 8 leh ni 9-ah lirthei chhuah tir a tum a, hetihlai hian Lirtheia Eizawng Pawl te erawh chuan ni 9 thleng uluk takin siam se an duh a, sorkarin lirthei te a chhuah tir dawn a nih chuan heng kawng chhe zual te siamtha nghal zel turin lung bakah excavator, JCB leh hnathawktute duty turin dah reng thei se tlemin a ziaawm theih a rin thu a sawi.

"Lirthei Tlan Chawlh" an puan chu sorkar nek zawng leh mipui tihbuai nan ni lovin hnathawhna atana hun an pek a nih avangin sorkarin lirthei a tlan

theih e a tih chuan an ding lui dawn lo tih a sawi a, hetihlai hian sorkarin kawng siam vengtu tur Police a dah chu lawmawm an tih thu sawiin, sorkar chuan kawng dinhmun veng chhunzawm zeltu tur dah se an duh thu a sawi bawk a ni.

Hetihlai hian sorkar thuchhuah chuan, Kawnpui - Sairang road NH-06 a motor tangkhang mek zingah Silchar lam pana motor haw thla, Buichali Hmar lam zawnga tang te chu nizan khan chhuahthlak tir tur an ni a. Sairang leh Buichali inkara tangkhang te vawiin lamah chhuah an ni ang.

<><><>

CM

New Delhi-a cham mek Chief Minister Pu Lalduhoma leh National Handloom Development Corporation Limited Managing Director Commodore (Rtd) Rajiv Ashok te chu nimin khan Mizoram House-ah an inkawm a, Mizo Handloom tihhmasawn dan tur an sawidun.

An thil sawi langsar zual zinga, Mizorama la dahkhawlna tur siam dan tur te, Mizorama office hrang hrang leh sawrkar hmun pawimawha local handloom product hman tam dan tur te, product tha leh tlo zawk a awm theih nana modern electronics Jacquard handloom uar ve dan tur te.

Ladeh thiamte thiamna tihsan zel dan tur leh state pawna an intihlar deuh deuh theih dan tur te, National Handloom Development Corporation Limited mithiamten Mizoramin nasa zawka hma a sawn theih dan tur ruahmanna an rawn siampui dan tur te a tel a, hei bakah hian Mulberry atanga la siam chhuah tam zawk Mizoramin a neih theih dan tur te an ni.

<><><>

NSS FESTIVAL

Sports & Youth Services Minister Pu Lalnghinglova Hmar chuan North East National Service Scheme (NSS) Festival 2025 chu nimin khan Art & Culture Auditorium, Berawtlangah a hawng a,

He kut hi Mizoram Sports & Youth Services Department hnuaia State NSS Cell leh Ministry of Youth Affairs & Sports hnuaia Regional Directorate of NSS-te buatsaih a ni.

Minister Pu Lalnghinglova Hmar chuan NSS chu thalaite hnena zirlaibu pawn lama thil pawimawh zirtirtu, khawtlanga an mawhphurhna hriattirtu a ni, a ti a. Mizoramah ngei pawh NSS hnathawh rah chu awmze nei leh hmuh theihin a awm tih sawiin, COVID laia an tangkaizia leh, thing phun leh faina lama an thawhhlawkzia a tarlang a ni.

He hunah tarlan anih danin, Kum 1972-a Pachhunga University College-a NSS unit din kha Mizorama a hmasa ber a ni a. Tunah chuan zirna in 103-ah NSS unit din tawh niin, kum 1988 khan State NSS Cell din a lo ni tawh bawk.

State NSS Officer Dr. Lalrinmawia report atanga hmuh danin, NSS chu pawl anga a thlawna thisen pe tamte zinga pakhat a ni a. Thisen pek camp hi 2024-2025 chhungin vawi 82 buaisaih tawh niin, thisen unit 6000 chuang pek a ni a. Thing phun, khawpui then fai leh awareness campaign hrang hrang an lo huaihawt tawh bawk. Kum tin, khawtlang tana thil tangkai, waiting shed, public bench, vantlang zunin leh a dangte 60 chuang sak thin a ni a. NSS Cell Mizoram chu hmarchhak state-te zinga kum tina Annual Report chhuah thei awmchhun a ni.

North East NSS Festival hian ni nga chhunga awh dawn a. Hmarchhak state hrang hrang - Mizoram, Assam, Manipur, Nagaland, Tripura, Sikkim leh Meghalaya – atangin NSS volunteer 250 vel leh Programme Officer-te an tel a ni.



MTA MEETING

Mizo Territorial Army MTA lo awm lailawkna tur chu Bung Bangla ah siamthat mek a ni a, an hmunpui tur pawh uluk leh zau zawka enchho tura ruahmanna siam a ni.

MLA Lt. Col. Clement Lalhmingthanga kaihhruaiin (MTA) chungchang meeting hi nimin khan Secretariat Conference Hall, MINECO-ah neih a ni a, he thutkhawmah hian MTA lak dan tur leh an awmna tur sawiho a ni a. MTA recruitment hi kumin November thla bawra neih theih tura beisei a ni a, a bul tan nan Mizo hlang awmna Company hnih din phawt tura ruahman a ni.

Meetingah hian Home Dept, Finance Dept, Sainik Welfare & Resettlement, Land Revenue & Settlement, PWD, PHE, P&E, I&PR, GAD leh MYC aiawhte an tel a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



RAILWAY

Hmarchhakah rel kawng km 278 a thui siam a ni tawh. Union Railway Minister Ashwini Vaishnaw chuan Lok Sabha ziaka zawhna chhangin hmarchhaka rel kawng siam nan hian cheng vaibelchhe sing li sang 1 leh 676 hman a ni tawh a ti a. Tun dinhmunah km 777 a thui rel kawng siam turin project pawm anih tawh thu sawiin hei hian hmarchhakah relkawng nasa takin a tichangtlung dawn a ti bawk.

<><><>

US

US in an rama India bungraw thawnlukah chhiah a ti sang chu rorelna lai lo, dik lo leh ngaihtuah chiang loa thiltih anih thu India chuan a sawi nawn. US President Donald Trump-a chuan India tan tariff hi zaa 25 in a tisang a. Hemi chungchangah hian Union Ministry of External Affairs chuang thuchhuah siamin ram tana tha ber tur ngaihtuahin India chuan hma a la zel dawn tih a sawi a. Russia atanga India-in tuialhthei a lakluh thin chu tunhnaiah US chuan a rawn bei tih sawiin MEA chuan sumdawnna thil atan chauh tuialhthei lakluh hi kalpui anih thu leh ramchhung mi tluklehdingawn 1 leh vbch 40 chuangte n an mamawh energy an hmuh theihna tura oil hi lakluh anih thu a sawi a. US in hetiangah hma ala ta mai chu a vanduai thlak thu sawiin ramdang pawhin anmahni mi leh sa te thatna tur vekin hma an lak thu a tarlang bawka ni.

<><><>